

علوم اقتصادیه و اجتماعیه

مجموعه گار

هر آيت برنجی کونی نصر اولنور

مؤسسلری :

احمد شعیب ، رضا نوقیو ، محمد هاربه

مندرجات :

عضویتلر و جمعیتلر : ساطع . — مجادله حیاتیه و تکامل
 جمیات : آصف فطی . — ویانه مؤعری : احمد شعیب . —
 موت بودجه : احمد مختار . — تریه عقلیه : دوکتور ادم . —
 فرانسه اخلال کبیری : احمد شعیب . — دیون عمومیه عثمانیه :
 محمد جاوید . — اشربات و وقایع اقتصادیه : محمد جاوید . —
 ۱۸۶۳ و ۱۸۶۴ سنلری استقراضنک مقاوله نامه سی .

مدیر و صاحب امتیازی :

محمد هاربه

امور اداره و تحریریه : نور عثمانیه جوارنده ملنن اداره خانه سی

نسخه سی : ۱۰ غروش

استانبول

باب طالی جاده سنده هلال مطبعه سی ، نومبرو ۶۶

علوم اقتصادیه و اجتماعیه مجموعہ

عضویت و جمعیت

جمعیتل ایله عضویتل آره سنده ، اڭ سطحی انظار تدقیقه بیلہ چارہ حق درجہده جلی ، بر مشابہت وار : بوتون جمعیتلر ، — بوتون ملتلر ، بوتون حکومتلر — ، عضویتلر کی طوغور ، بویونور اولیور . عضویتلر ایله جمعیتلر آره سنده بونقطه نظر دن موجود اولان مشابہت پک اسکی متفکرلرک بیلہ انظار دقتنه چارمیش ایدی : افلاطون و آریستوت ، حکومتلری برر حیوانه بکزمملر دی . بالخاصه حکمای اسلامیه دن ابن خلدون ، بونقطه نظری توسیع و تعمیق ایدرک حکمت تاریخه اساس اتخاذ اتمش ، و دولترلرک عضویتلر کی برر عمر طبیعی صاحبی بیلہ اولدینی ادعا ایلمش ایدی .

عضویتلرک بنیه سی حقنده معلومات ، ثبته استحصال ایدیلنجہ ، هر عضویتک بر چوق حجیر اتدن — بر چوق مصوراتدن — متشکل بولدینی کشف اولنجہ ، بومشابهتک ایله ظاهری و سطحی اولیوب درین و حقیقی اولدینی آکلاشیلدی : طبیعتشناسان و حیاتشناسانک تدقیقاتی ایلرله دجه عضویتلرک برر جمعیت کی تلهیسی فکری قوتلندی ، « هیئات حیوانیه Colonies animales » نظریه سی تأسس ایدی ؛ اقوام — شناسان و جمعیاتشناسانک تدقیقاتی ایلرله دجه ده جمعیتلرک برر

عضویت کبی تلقیسی فکری قوتلندی، « عضویات اجتماعی - Organism me social نظریه سی چیقدی. ایکی مختلف سلسله مساعی و تدقیقاتک نتیجه سی - محل وصول و تلاقسی - اولان بوایکی نظریه، عینی مسئله نك ایکی مختلف جبهه سی، عینی حقیقتک ایکی مختلف افاده سی دیمکدر؛ اونک ایچون بربرینه فوق العاده مر بوطدر.

بولاردن بالخاصه « تعضوا اجتماعی » نظریه سی چوق منافشات و مباحثاته سبب اولمشدر؛ چونکه بعض علما طرفندن، « حکومت مطلقه لری مدافعه یه خادم بر سلاخ » مقامنده تلقی ایدلشد. بوطرز تلقی به قاپیلانلر « اگر جمعیتلر حقیقه برر عضویتسه، برر دماغه - برر حکومت مرکزیه و مطلقیه - محتاج دیمکدر » دیمشردی. - حالبوکه بو کون محققدرکه : دماغک حاکمیتی - عضویت بشریه ده بیله - ظن ایدلدیکی قدر بوبول و مطلق دکدر؛ فضله اوله رق عضویتلرک پک مختلف انواعی، پک متفاوت درجاتی وارد؛ هپسی عضویت بشریه طرزنده دکدر، اونک ایچون « جمعیتلر برر عضویتدر » فکرندن مطلقا « جمعیتلر تماما برر انسان کیدر » نتیجه سنک چیقارماسی لازم کلمز. بو نظریه حقنده طوغری بر حکم ویره ییلک ایچون، اول امرده عضویتلرک نه کبی انواع و درجاتی بولندیقنی ییلک بونک ایچونده « هیئات حیوانیه » نظریه سی تدقیق ایله مک اقتضا ایدر.

۱

تدقیقات خرده بینیه قطعی ر صورتده کوسترمشدرکه: بوتون عضویات بر طاقم غایت کوچوک کوچوک جسیماتدن متشکلدر. حیره Cellule و -دها طوغری بر تعبیر ایله - مصوره Plastide نامیه یاد ایدلکده اولان بو جسیمات هر درلو اوصاف حیاتیه ایله ده متصفدر. تقدی و تنفس، نما

و تكثر، حتى تحرك وتخرش كى خصائص اجاسيه حياتيه نك هپسى بونلرده ده
كمال وضوحه مشاهده ايدلمكده در. اونك ايجون بونلر عضويتلرك هم
بنيه وهمده حيات نقطه نظرندن عناصرى ديمكدر .

بوعناصر تشرېحيه و حياتيه ايله ، حيوانات و نباتات ابتدائيه اسمى
ويريان مخلوقات خرده بنيه آره سنده - كرك شكل و كركه حيات نقطه
نظرندن - شديد بر مشابھت و حتى بعض نوعلرده قطعى بر مماثلت كورلمكده در.
مثلا انسانك حونيات، نوپه سى « نقيعيه مسوته » به Infusaires flagellés
خجيره نك مصورات بشريوه مهدبه سى « نقيعيه مهدبه به » infus-ciliés
قانك كريات بيضاسى آميديه به Amiboides پك مشابهدر. باخصوص
دها بسط حيوانلرك از جمله اسفنجيه لرك بعض مصوراتى ايله حيوانات
ابتدائيه آره سنده بر فرق بيله يوقدر . اونك ايجون حيوانات ابتدائيه
و نباتات ابتدائيه « منفرداً ياشامقده اولان مصوره لر »، مصوره لرده « مجتمعاً -
بر عضويت حالنده - ياشامقده اولان حيوانات ابتدائيه » كى تلقى
اولونه بيلير .

« هر عضويت بر هيات اجتماعيه در ؛ هر عضو بر حال اجتماعيه در »
نظريه سى ايسته بوصوك تلقى مثبت و محقق نتيجه سيدر .

اوت ! هر عضويت بر هيات اجتماعيه در ؛ عضويت بشريه دخى داخل
اولدېنى حالده بوتون عضويتلر بر چوق افرادك - بر چوق مصوراتك -
اجتماعندن مكوندر . بو افراددن هر يرك بر حيات ذاتيسى، بر استقلال
شخصيسى واردر : هر يى منسوب اولدېنى عضويت - داخل بولندېنى
هيات - ايچنده مستقلاً طوغمقده ، بو يومكده ، ياشامقده ، اولمكده در ؛
عضويتك حيات و فعاليتى ، بو افرادك حيات و فعاليتلرينك محصله سندن
عبارت. شوقدر واركه مصوراتك استقلال حياتى قطعى و مطلق دكلدر :

بونلر آره‌سنده — آز چوق — بر ارتباط متقابل Solidarité دخی واردر . چونکه عضویتلرک افراد و مصورات مشکله‌سی آره‌سنده نوعاً بر تقسیم اعمال و وظائف موجوددر : هر طاقم مصورات بر قسم افعال حیاتیه‌ده تخصص ایتمش ، اوافعالی بتخصیص دها شدت مکملیتله ایضایه مساعد بر حال و شکل آیتشدر . اونک ایچون هر مصوره‌نک فعالیتی دیگر مصوره‌لرک فعالیتلرندن متأثر اولمقده ، بالمقابل اونلرک فعالیتلری اوزرینه اجرای تأثیر ایله‌مکده‌در . مثلاً عضویت بشریه‌یی تشکیل ایدن مصوراتک انواعی یک چوق ، بونلر آره‌سنده بنده‌جه تخلف différenciation و فعالیتجه تخصص spécialisation یک شدیددر . از جمله مصورات مجرای دم — ترکیلرنده‌کی خصوصیت حسیه‌یه — یک چوق مقدارده مولدالموضه جذب و بلع ایتک قابلیتده‌در ، اونلرک مص ایتدیکی مولدالموضه بوتون دیگر مصورات بدنک احتیاجات تنفسیه‌نی دفعه خدمت ایتکده‌در ؛ غدد هضمیه‌سنگ مصوراتی افرازانده تخصص ایتشدر ، اونلرک فعالیتی بوتون مصوراته لازم اولان اغذیه‌نک قانه یکمسنی تأمینه مدار اولمقده‌در ؛ مصورات عصبیه قابلیت تنبه و تخرشده شدت و خصوصیت کسب ایتشدر ، اونلرک فعالیتی بوتون مصوراتک فعالیتلری آره‌سنده بر آهنگ تأسیسه بادی اولمقده‌در ... بوصورتله عضویتیزی تشکیل ایدن مصوراتدن هر بری هم دیگر مصوراته منفعت تأمین ایله‌مکده هم‌ده اونلردن منفعت کورمکده‌در ؛ تعبیر آخرله عضویتده هر فرد ، کله هم « خادم » و هم‌ده « محتاج » بولمقده‌در . ایشه بواحتیاج و ارتباط متقابل ، مصوراتک استقلال شخصیه‌یی تحدید و تقید ایله‌مکده‌در .

عضویتلرک عناصر مشکله‌سی آره‌سنده موجود بولنان استقلال

وازتباطك درجه‌سی يك متفاوتدر. عمومیتله ارتباط ، عضویتده کی تقسیم افعیالك و - تقسیم افعال ، عضویتلرده معضلیت و مکملیتك اك جلی معیارى واك قوی مؤثری اولدینی ایچون - معضلیت و مکملیتك درجه‌سیله معکوساً متناسبدر. عضویات بسطده عناصر مشكله آره‌سند - بنیه تخلف و فعالیتاً تخصّص يك آز اولدینی ایچون - ارتباط يك خفیفدر ؛ اونك ایچون بو عناصرك منسوب اولدقلری عضویتدن آریئالری ، اوندن آری یاشامالری ممکندر : مجتمع و متکثب تفعیللر ایله اسفنجییلر و پولپلر بوحالدهدر . بونلر پارچه‌لاندینی حالده بیله ، هر پارچه‌لرینك آری باشنه یاشامقده و بویومکده دوام ایتدیکی کورولمکدهدر .

بونلردن اپی دهها مکمل و معضل عضویتلرده بیله عینی حادثه مشاهدده اولتمقدهدر : طوبراق و باغیرصاق صولوجانلری و باخصوص بعض صولوجانلری دخی پارچه‌لانیچ، هرپارچه تك باشنه یاشایالمکدهدر . برقات دهها مکمل و معضل اولان عضویتلرده آرتق بو ، قابله اولامیور ؛ اولنلرده تقسیم اعمال و تخلف اشکال يك چوق دهها یلری اولدینی ایچون آریلان پارچه‌لر و عضولر ، بویله مستقلاً ادامه حیات ایدهمیور . مع مافیله اولنلردهده بویارچه‌لر بردنبه اولمیور ، بر مدت دهها یاشایور ، حتی حرکت بیله ایدیور : چکیرک‌لرک مفاصلی بدنن آریلدقندن سوکرده حرکت ایدر ؛ ییلان بالخی یوزولدکدن پارچه‌لاندقندن سوکره بیله قیپردار ؛ حیاً تشریح ایدیلن طاوشانلر ممانلرندن سوکره باغیرصاقلرینك حرکات دودییه‌سی دهها بیوک بر شدت کسب ایدر ؛ قورباغه‌لرک قابلمباغه‌لرک قیللری ، کوکسلرندن چیقارلدقندن سوکره بیله ساعتلرجه مدت ضربان یلر ؛ بوتون حیواناتك مصورات منوییه‌سی ، خارجده کمال استقلال و سربستی ایله حرکت ایدر ؛ قورباغه‌لرک خنجره‌لرینك غشای مخاطیسی چیقاریلوب

صو اوزرینه قونجه — اهداب متهززه سنك تاثير يله — كندی كندینه
 تبدیل محل ایلر بو عضولرك ، بونسچلرك ، منسوب اولدقلری
 عضویتدن آیریلجه بالکیز بر مدت یاشاماسی ، صوکره — ارکچ —
 اولمسی ، عضویت داخلنده آلیشمش اولدقلری شرائط خصوصیه حیاتییه
 خارجده بولامالرندن طولاییدر ؛ بو ، طبق بوتون حیاتی تفکرات
 صرفه ایله کچیرمش — ونشر ایتدیکی آثار سایه سنده یاشامش — بر
 عالمك هیئت اجتماعیه دن آیری منفرد قالدینی تقدیرده تأمین معیشته مقتدر
 اوله میهرق اولمسی کییدر : نباتات عالیه نك یاراققلری وداللری طوغریدن
 طوغری به تغدی ایدمه جهك — علی العاده : کوکلرك اعانه یله یاشایه -
 بیله جهك — بر بنیه ددر ، اونك ایچون فدانندن قونجه قوروپوب تلف
 اولمقده در. حیواناتك قیروقلری علی العاده قاندن غذا آلهرق بسله نمکده در؛
 اونك ایچون — كرك اونلرك عضویتدن آیرماسی وکرکسه عضویتك
 اولمسی سببله — قانك اعانه سندن محروم قانجه یاشایامقده در . معافیله
 بونلر ، بدنن آیریلش عضولر ونسچلر ، «منسوب بولندقلری عضویتده کنه
 مشابه شرائط حیاتییه نی جامع» بر محیطه تصادف ایدمه ییلرلرسه ، ینه یاشایا -
 جقلر در . طبیعی وصناعی آشی ، دالدرمه وچلیك عملیاتلری بوکا بر دلیل
 قطعیدر : ر سوکود دالی قوپاریلجه قوروپور ، فقط راطب طوبراغه
 کومولنجه كوك صالهرق یاشبور ، بویویهرك بر فدان تشکیل ایدپور .
 بر کیراز دالی کیسلنجه قوروپور ، فقط اویغون بر آچاچ اوزرینه
 آشیلانجه یاشبور ، بویویهرك میوه ویریور . بر سحلب کوکی ، بر به غونیا
 یاراغی بیله مستقل برفدان تشکیل ایدمه ییلدور .

بر قاووجوق یاراغیده — عصیه سنی یاردقدن صکره طوبراغه
 کومولدیکی تقدیرده — كوك صالهرق باشلی بر نبات ، مستقل بر عضویت

کجی یا شابور ...

بوناره مشابه تجربهلر حیوانلر و حتی انسانلر اوزرنده بيله اجرا ایديله بيليور : جلد ، بشره ، غشای مخاطی ، غشای مصلی آشیلری . يك سهل الاجرا تجربهلر دندر ؟ قرنيه لامعه ، عضله ، عصب ، سمحاق و حتی عظم آخیارنده بيله موفقیتلر الده ايندلمكده در . بو نسجلك يالكتر بر حیوانك بر عضوندن ديكر عضوينه و یا عینی نوعدن ديكر بر حیوانك عینی عضوينه دكل ، بوسبوتون باشقه نوعدن بر حیوانك بوسبوتون باشقه بر عضوينه بيله آشیلا ناسی قابل اولمقده در :

قوزودن انسانه ، خوروزدن طاووغه ، حتی طاوشاندن طاووغه آشیلر بيله مثبت و قطعی نتیجلر حاصل ایتمشدر . متعدد نسجاردن متشكل عضولر بيله بر حیواندن باشقه بر حیوانه نقل ایديله بيليور : (ترامپله سی) بر جوق پولیلری پارچه لادقندن صوكره بوپارچه لری بر برینه اكليه رك آشیله برق تكرار پولیلر تشكینه موفق اولدی ، (بول بهر) فاره لك قوروقلرینی آياقلرینی صیرتارینه ، بورونلرینه آشیلادی . (فلیپو) بر خوروزك مهموزنی ایدیکنه ، بر قوباك دیشی بر خوروزك ایدیکنه آشیلامغه موفق اولدی . (غلوق) بر طاوشانك عضله سنی بر طاووغه ، (هونتهر) بر خوروزك خصیه سنی بر طاووغه نقل ایتدی ... بویولده ، کیتدکجه بر برندن محیر موفقیتلر توالی ایدوب طور بور . دری و دیش آشیلری آرتق عملیات جراحیه صیره سنه کچمشدر : تصنیع بالانس Autoplastie ، تصنیع بالغير Hétérplastie ، تصنیع انف Rhinoplastie ، تصنیع جفن Blépharoplastie ناملریله معروف اولان عملیات جراحیه ، حیوانی آشیلردن و دالدرمه لردن باشقه برشی دکلدر : قورشون آتش و یا پاره تأثیریه صیریلان وغائب اولان دریلرک یرلری ،

بدنك باشقه يرلرندن ويا باشقه بر انسانك بدنندن آلنان دري پارچه لري .
 بيله طولدوروله بيلور ؛ قولدن ويا آيئندن سييريله دريلر واسطه سيله
 بورونلرك وكوز قاباقلرينك نقصاني تلافى اولنه بيلور ؛ اكري چيقمقده
 اولان بر ديشي سو كوكوب ديك اوله رق آشيلا مق ، بر قضا اوزرينه
 دوشن بر ديشي تكرار يرينه ديكمك خصوصلرنده مشكلات چكيلميور ؛
 ديشلرني غائب ايدن كبارلر ، فقرادن سو كوله ديشلري آشيلا مق بيله قابل
 اوليور . آلين دريس ايله بورون ياي مق عملياتي ، اسكي هنديلر طرفندن
 بيله تطبيق ايديليور ، عربلرجه ده بيلنيوردى . دوللولر انساننده
 پوروندن وچكه دن كسيلن پارچه لرك تكرار يرينه آشيلا نمسي يولنده موفقيتلر
 بيله واقعدر .

سايمان دقتدركه لسجلر وعضولر ، بدنندن آيرلدقن اپي برمدت
 صوكره بيله آشيلا نه بيلور : انسانلر اوزرنده يايئلقده اولان ديش
 آشيرلنده بر قاج ساعتك تأخرلر دن ضرر كوروله مكده در . پول بهر ،
 فارملرك قويروقلريني كسدكدن يدي كون صوكره آشيلا ديني حالده بيله
 طوتدورمغه موفق اولمشدر ...

بوتون بوتجره لر آرتق هيچ شهه براقيوركه : اك معضل واك مكمل
 عضويتلرده بيله مصورات « مستقل الحيات » در ؛ بوقيل عضويتلرك
 مصوراتي بيله - آره لرنده كي روابط و مناسبات متقابله نك شدته رغماً
 - بر « حيات ذاتي » صاحيدره . هر عضويتك حياتي مدتجه مصوراتي -
 بر حكومتى ، بر ملتى تشكيل ايدن افرادكي - طوغيور ، بويويور ، نسل
 براقيور ، اوليور . بوتون بوتولدات و وفيات آره سنده ، عضويت ،
 هيات مجموعه - بر شخص معنوي ، بر جماعت ، بر ملت كي - پايدار قاليور .
 عضويتلر ، بو هيات اجتماعيه لر داخلنده حربلر ، جداللر بيله

وقوعه کلیور : مولد المرض میقرویلر، باقهریلر بر عضویتله داخل اولنجیه، اومنفرد و وحشی متعرضلرله عضویتک او مجتبع ومدنی افرادی آره سنده بر حرب وجدال باشلیور. (مه چینقوف) ک تحریات و کشفیات سابه سنده آکلاشیلشدرکه : عضویتک ، بالخاصه بویله اجانبه قارشى مدافعه سی قابلیتندله تخصص و تکمل ایتش بر صنف مصوراتى وار! بونلر، مصورات بیضای دم - فاغوستیلر، مصورات آکله - ، عضویات عالیله تک قوه ضابطه و عسکریه سی مقامنده در! منسوب اولدقلری هیأت اجتماعیه تک افرادی آره سنده بر اجنبی داخل اولدیمی، در حال اونک اطرافنه طویلانی، اونی احاطه ایدرک هضم و تمیل ایله افتایه چالیشیرلر. منتن یاره لرک ایرینلری، ورمیلرک بالفاملری، ساری خسته لفلرک آقتیلری.. بویکی صنف مجادلینک - متعرضین و مدافعینک - انقاضی ایله، لاشه لرله مالامالدر! عضویتک مرض و شفاسی، اضمحلال و مقاومتی معلولیت و معافیتی.. بالخاصه بوزمرء مدافعینک نتیجه فعالیتلرینه، غالییت و یا مقلوبیتلرینه تابعدر [۱]. عضویتک یالکیز معلولیت و معافیتی دکل، حیات و مماتی، و هر نوع فعالیت بیله، عناصرینک حیاتلری نتیجه سندن، فعالیتلری محصله سندن عبارتدر :

[۱] فاغوستیلرک تأثیر اکلی و نقائسی، فاغوستوز phagocytose دینان حاده بعضاً عضویتک مصورات مشکله سی حلپنده توجه ایدر. علم حیاتده Résorption نامیه معروف اولان حاده مه قانیزمه سنک فاغوستوزدن عبارت اولدیغی تحققی ایتشدر : از جمله قورباغه لرک استحالهلری اثناسنده قویروقلری تشکیل ایدن مصوراتک فاغوستیلر طرفندن احاطه و تمیل ایدلدیکی قویروقک بوسبیله غائب اولدیغی تدقیقات خرده بینهدن آکلاشیلشدر. مه چیتوف، شیخوختی بیله بر فاغوستیوزه اسناد ایدیور : شیخوخت اثناسنده فاغوستیلرک مصورات بدن اتلاف ایتدیکنی ادعا ایدیور. اگر بوظنریه طوغری ایسه، دیتمک اولوبورکه، عضویتلرک اضمحلال طبیعیسی - بر چوق ملترلده و سکومتلرده اولدیغی کبی - بر فساد و عصیان عسکری نتیجه سی!

قولنك اڭ ناچين بر حركتى بىلە مىليونلارچە مصورائىزك محصلە
فعاليتىدىن باشقە برىشى دكل؛ هر نفسىزلە هوايە صاحوب طوردىقمىز غازلە
مىليارلارچە مصورائىزك فضلات حياتىيەسىدىن عبارت ۱

عضويتلىرى ، اكثريا ، ماسكەنلەرە تشببە ايدرلار . يك زبازد
اولان بو تشببەدە ، — موضوع بىشمىز اولان نقتە نظردن — ، بويوك
برخطا ، بيوك برقتىقان واردىر : عادى ماسكەنلەردە حركت ، بر قوتك
تجلىلى نتيجهسىدىر ؛ مختلف قىسلار ، مختلف چرخلار ھې بر قوۋ
مركىزىيەنك تاثيرلە حركت ايدر . عضويتلەردە ايسە حركت ، بالەكس
، برچوق كوچوك كوچوك قوتلارك تركىبى نتيجهسىدىر ؛ مختلف قىسلار ،
مختلف لىچىلار ھې كندى كندىيەنى ذى حيات ، كندى كندىيەنى فعالدىر .
اڭ معضل واك متركىز عضويتلەردە بىلە بر قوۋ مركىزىيە يوقدىر ؛ اولاردا
حيات و حركتك اڭ مەھم اركانىدىن اولان دماغ و سائر مراکز عصيە دىخى
بر مركز و منبع قوت دكل ، سادەجە — اقسام مختلفەنك فعاليت ذاتىيەلىرى
آرەسىنىدە بر آھنك و توافق تاسىس ايدىن — بر مركزىيە و مناسبدىر .
بونقتە نظردن عضويت بر ماسكەنە و يانخار و اليكتريق موتورلى ايلە متحرك
بر فابرىقە دكل ، هر برقىمى ھېر دىسكاھى آيرى برر قوتلە ايشلىن بر
فابرىقە ، هر صنقى باشقە بر صنعتلە اشتغالە آليشمىش برشەر خلقنە ، ھېسى
برقووان ايچون چالیشان بر آرى سوروسنە ، والحاصل : افرادى آراسىندە
بر ارتباط متقابل — بر ارتباط — موجود اولان برھيات اجتماعىيە ... تشببە
ايدىلك لازم كلىر .

برھيات اجتماعىيە ، اساساً برعائللە دىمكدىر . چونكە بوتون افرادى ،
برتك مصورەنك — بىضە ملقىمەنىك — نىلىدىن عبارتدىر . بو

حیات، مصوره و والده تجزی ایدمه ایدمه تکرر ایلور، و برکتلی برنسل وجوده کتیره رک عضویتی تشکیل ایلور. اونک ذرینی اولان مصورات بدایتاً بر برینک عینی اولور، صوکره تخلفه تخصصه باشلور، و بوتخلف و تخصص نتیجه سنده تسجاری و عضوری تشکیل ایلور. تکامل رشیمی حقنده کی تدقیقات بوکا شبهه بر اقامده، هر عضویتک شکل قطعینی آنجهیه قدر بر چوق اشکال متوسطه و موقته دن — آز چوق بر سر عتله — کچدیکنی اثبات ایتکده در. بو اشکال رشیمه و موقته نک اشکال کاهله و قطعه ايله مقایسه سی، تکامل شخصیتک تکامل نوعی بی خلاصه تکرار ایتکده اولدینی کو سترمش؛ و بوسایه ده عضویتلرک شکل تدریجیسی حقنده بر چوق وثائق و مشاهدات اوزرینه مستند — بر نظریه تأسیسه امکان بخش ایتشدیر :

اک ابتدائی ذوی الحیات — اک بسیط حیوانات و نباتات — منفرداً یاشایان برر مصوره یه — برر پلاستیده — معادلدر. هپ خرده بینی اولان بو مخلوقات عمومیتله صو ایچنده یاشار، تجزی و یاتزرر صورتیه تکرر ایدر، و بعض احوالده کومه کومه طوبلانیرلر. عضویتلرک، شبهه سز، ایلک تخمی ایلک منشای اولان بو کومه لرک تشککنده ایکی طرز اساسی، ایکی سبب اصلی مشهود اولور: بعضاً منفرداً یا شامقده اولان مخلوقات خرده بینیه نک اجتماع و تکتب ایتدیکی، بعضاً ده تجزی و یاتزرر ايله حصوله کلن افرادک بر برندن آریلیه رق مجتمع قالدینی کورولور، قطورک پلازمو دیلری برنجی، نقیعیه لرک شجری نوعلری ایکنجی صورتیه تشککل ایتش برر هیئاتدر. بو کومه لرده، بو هیئاتلرده حال اجتماع اساساً عارضی و موقدر؛ اونی ایجاب ایدن حال ايله — اکثر یا محیطده کی مواد مغذیه ده

حدوثه کلن نقصان، بعضاً افرادہ توالی بطون سببیلہ عارض اولان انفہال ایلہ — قائمدر . فقط بوحال تمادی ایدرسہ ، افراد مشککہ نك هپسی محیطہ قارشى عینی وضع وموقعہ بولنمادیفی ایچون بالطبع هپسی عینی طرز وشدتہ فعالیت کوسترمیه جک، اونک ایچون آرہ لرندہ بر تقسیم اعمال باشلامش اولہ جق ؛ فعالیتجه باش کوسترن بو انقسام وتخصص بنیہ جہدہ بر تخافی انتاج ایدہ جک ؛ بو صورتہ عناصر مشککہ آرہ سندہ بر ترابط حدوثہ کلش، هیئات بر شخصیت کسب ایلہ مش بولنہ جقدر .

بوهیئاتک شکلی، تشکلی موجب اولان شرائط محیطیہ کورہ تعین وتقرر ایدہ جک ، اونک ایچون او هیئاتدن آیریله جق مصوراتہ دہ ینہ اوکا مشابہ هیاتلر تشککنہ باعث اولہ جق ، بو صورتہ هیأت بر قابلیت تکثیریہ وتناسلیہ بیلہ کسب ایتمش بولنہ جقدر . بو ، سلم تعضوک برنجی قدمہ سیدر . بودرجہ تعضوہ حیاتشناسان اک زیاده (مہرید Méride) نانہ ویرمکدہ در . طاتی صو پولیلری ، ایدرالر، بر مہریددر ؛ عضویات عالیہ بیلہ تشکل رشیی انسانندہ مہرید شکلدن کچمکدہ در : پلانولا Planula وتروخوسفہ Trochosfère نامرلہ معروف اولان اشکال رشیہ بر مہریددن عبارتدرہ قورایلر یومورطہ دن پلانولا شکلدنہ وا کثر دیدان وناغمہ لردہ یومورطہ دن تروخوسفہ حالندہ چیمقمقدہ اولدیغنه کورہ بو حیوانلر بدایہ بر مہریددن عبارت دیمکدر .

بالاستیدلردن بسیط بر هیئات — بر مہرید — تشککنہ باعث اولان حادثہ ، مہریدلردن دہ ، دہا معضل بر هیأت — دہا یوکسک بر عضویت حدوثہ بادی اولور : مہریدلرکدہ تزرو تکثری انسانندہ افراد جدیدہ سی برزینہ ومولدلرینہ مربوط قالہ بیلر ؛ اوزمان بر مہرید هیاتی تشکل ایتمش اولور . بو صورتہ حصولہ کلن هیأتک افراد مشککہ سی — مہریدلری —

آره سنده ده تقسیم اعمال و ترابط وقوعه کله یایر ؛ اوزمان او هیأت ده بر شخصیت کسب ایتش بولونور . بو درجه تعضوه طبیعت شناسان (زوئید Zoide) نامی ویرمکده در . مه دوزلر و قورایلر برر زوئید در : تدقیقات واقعہ کوسته ریورکه مه دوزلر ایدرا هیأت شجریه لری اوزرنده بر فرد هاضم ایله درت فرد صیادک تحول و التصاقدن حصوله کلیور ؛ قورایلر دخی بر فرد هاضم اطرافنده سکز فرد صیادک تشکلی نتیجه سنده وجود بولیور .

عینی حادثه ، زوئیدلر دده دها معضل هیأتلر ، دها یوکسک عضویتلر تشکله بادی اولور : زوئیدلر دخی هیأتلر تشکیل ایدر ، بو هیأتلر دخی شخصیت کسب ایلر . بو ، اعضوک الیوکسک درجه سیدر . و حیات شناسان بیننده « دم dème » نامیله معروفدر . حیوانات فقریه و مفصلیه برر ده مدر . مفصلیه لرک نواحی بدنی برر زوئید ، بونلری تشکیل ایدن مفاصل برر مه ریددر . فقریه لرده ، وهله زوئید و یا مه رید نامی ویریله بیله جک قسملر کوروله مز . فقط بو شعبه حیواناتی دیدانه ربط ایدن اشکال متوسطه و اشکال رشیه خقنده کی تدقیقات ، آرتق هیچ شبهه بر اقبورکه اونلر دخی بر طاقم زوئیدلرک اجتماعدن متشکدر : فقراتک هر بریسی - حداسنده کی عضد عصبیه ، اضلاع و عضلات ایله برلکده - بوزوئیدلرک شخصیتی بر درجه یه قدر محافظه ایتش التصاق و اختلاطدن مصون قالمش برر قسیدر . بعض بویوک شهرلر ناصل بر طاقم کوچوک کوچوک کویلرک بویویه بویویه برلشمسندن و قاریشماسندن حصوله کلش ایسه ، فقریه لر دخی اولیله جه ، بر طاقم زوئیدلرک بویویه بویویه یرلشوب قاریشماسندن حصوله کلشدر بویکی شهرلری تشکیل ایتش اولان کویلر ناصل شخصیتلرینی غائب ایتش بولونورلر سه ، اونلری آبرمق ناصل وهله غیر قابل و ناصل تدقیقات

تاريخيه اجراسنه متوقف ايسه ، فقره لری تشکيل اولان زوئيدلرده اويلهجه شخصيتلريني غائب ايتمش ، آرتق اولنری تمين وهله غير قابل وتدقيقات رشيمه اجراسنه متوقف برحاله گلشدر .

بو حال حيوانات فقره يه منحصر اوليوب بوتون درجات معضودهده مشهود در : دهملری تشکيل ايدن زوئيدر ، زوئيدلری تشکيل ايدن مريدلر بعض عضوياتده يک نظرده بيله تفريق اولونه بيله جک درجهده محافظه استقلال وشخصيت ايتمشدر ؛ بعض عضوياتده ايسه - خارجاً بربرينه يابيشه رق وقايناشه رق ، داخلأ بربرينه کيروب قاريشه رق - غير قابل تمين برحاله گلشدر . بوايکي حدانتهائی آره سنده حدسز حسابسز اشکال وآانات متوسطه کورلکده در ؛ حتی بوندن طولاييدرکه چوق عضويتلرک برفردمی يوقسه بر هيئتمی عد ايدلسی لازم کله جکنی تعين خصوصنده مشکلات واختلافات بيله تحدث ايتکده در . فقط ، بونی تعين ايله اوضراشتمق ، بونی دوشونمک بيله عبتر چونکه فردلر ايله هيئاتلر آره سنده کی فرق ، ايشته کوروليورکه ، بر درجه فرقندن عبارت ، ترابط وتقسيم اعمالک درجه سنه تابع .. در . [۱]

والحاصل بلاستيدلر، مريدلر، زوئيدلر، دهملر... وبونلر آره سنده کی غير محدود اشکال متوسطه [۲].. ايشته سلسله عضوياتک حلقات متوالیه سی، ايشته سلم تعضوک قدمات متعاقبه سی، ايشته تکامل عضوياتک صفحات متتابعه سی...

[۱] بطنی الامعا حيواناتنده درجات تعضو واشکال متوسطه سی پک واضهدر ؛ اوراده افراد و هيئات عضويه پک نمونه لری وخطوط داخله سی پک چوقدر . اونک ايچون بو شعبه حيواناتی علم حیات نقطه نظرندن پک بويوک براهيمی حائر در ؛ آدمون پرې ، قولونی آينال نظريه سی اک زياده بوحیوانات اوزنده کی تدقيقاتی سايه سنده تأسيس ايتمشدر : علم حيوانات « مده (صهيفه ۲۶۸ - ۲۷۵) بواشکالک خطوط اساسيه سی وطرز تشکلی کوسترلشدر . [۲] تعضوک انواهی اکال ايتمش اولنی ايچون شوراسنی ده سوبله مک لازمدرکه :

عجبا بوسلسله بوراده نهایت بولیورمی ؟ یعنی تکامل تعضوک صوکه صفحہ سی (نہم) لردن عبارت قالیورمی ؟ یوقسه دہملر دخی برطاقم دہا معضل ہیائلر ، دہا یوکسک تعضولر تشکیل ایدیورمی ؟ شہسز ، دہملر دخی بوسہوتون منفرد قالیور ؛ اونلر دخی برطاقم سورولر ، جمعیتلر ہیائلر تشکیل ایدیور . فقط عجبا بونلرہ — بوسہورولرہ ، بوہیائلرہ ، بوجمعیتلرہ — برتعضو نظریلہ باقق ، بونلری دہ تکامل تعضوک برصفحہ حالیہ سی کی تلقی ایتک جائز میدر ؟ بوریہ قدر صرف علم حیات زمین اوزرنده جریان ایتیش اولان تدقیقات و مقایسات نتیجہ سندہ ایرادینہ مجبور اولدیغمز بوسؤلر ایلہ ، « تعضو اجتماعی » نظریہ سنہ تماس ایتیش ، آرتق اجتماعیات ساحہ سندہ آیاق باصحن اولیورز .



عضویتلرک ، — افرادی آرہ سندہ آزچوق برترابط موجود بولنان — بر هیأت اجتماعیہ مائل اولدینی آکلاشیلدقدن صوکرہ ، جمعیتلرک دہ بر عضویتہ تشبہی موافق اولدیغنی تسلیمہ آرتق تردد ایتیمک لازم کلیر . فقط بوشبہک درجہ نفوذ و شمولی تعیین — سطحی اولوب اولمادیغنی تقدیر — ایدہ بیلک ایچون ، ہر حالہ ہیأت اجتماعیلرک احوائی دہ اطرافیلہ تدقیق و بونلرلہ عضویتلرک احوال مجبوتہ سی آراسندہ

بعضاً مختلف النوع عضویتلر دخی اجتماع واشترک ایدر ؛ بوقبیل اجتماعات واشترکات غیر متجانسہ ، بعضا یالکز برطرفہ ، بعضادہ ہر ایک طرفہ تأمین منفست ایدر . حیات طفیلیانہ Parasitisme برنجی ، ہیمیائی Symbiose دینلن حالہ ایکنجی طرزہ نمونہ اولہرق کوستہ ریلہ بیلیر . بوقبیل ہیائلر ، وھلہ ظن اولندیغندن چوق دہا مبذولدر : نہاناندہ بویوک برصنف ، ہوتون شبہلر ، قطور ایلہ اشنیہلرک اجتماع واشتراکندن متشکدر .

مقایسات عمیقہ اجرا ایتک اقتضا ایلر . برعصردنبری دوام ایدہ کن
تدقیقات آنولوژیہ بو مقایسات ایچون یک قیتمدار مالز مه جمع واحضار
ایتمشدر .

شہہ سز ، بوتون هیأت اجتماعیہ لرده ده افراد مشکله آره سنده —
عضویتلرک مصورات مشکله سی آره سنده کی کی — هم استقلال و همده
ارتباط واردر . و بو ارتباط واستقلالک درجه سی یک متفاوت ، وتقسیم
اعمالک درجه سہ تابددر : بوشیانلرک واسکیولرک معیشت سربازانہ
وشخصیانہ سی ایله بویوک شہرلر زادکاننک حیات مقیدانہ وکبارانہ سی
آره سنده — بونقطہ نظر دن — نہ قدر بویوک برمسافہ وار ! جمعیات
ابتدائیہ ده ، هر فرد محتاج اولدینی هر شیئی کندی کندی نہ تدارک
واعمال ، معیشتی کندی کندی نہ تأمین ایدر ؛ بویله جمعیتلرده هر فردک
حال اجتماعیدن استفادہ سی ، جدال حیاندہ سهولت مدافعہ دن عبارت
قالیر . جمعیات مترقیہ ده ایسه هر فرد کندی معیشتہ یک آر یارایه جق
وبلکده هیچ مدار اوله میه جق شیرله اشتغال ایدر ؛ و آنجق مبادلہ
محصولات و مساعی سایه سنده تأمین معیشت ایلر . بویکی جمعیتلرده هر فردک
حال اجتماعیدن استفادہ سی ، یک بویوک و بوتون وسائط انتعاشہ
شاملدر .

جمعیتلر عضویتلرہ نشأت و تشکل اعتباریلده بکزرہ : شہہ سز
جمعیات بشریہ نک منشأی ده — هیئات عضوہ نک کی کی — یا تکبئی
ویاتولدیدر : اولرده ، یا افراد مختلفہ نک بر آریہ طویلناماسی ، و یا
اولادک والدین ایله بر آرده قلماسی صورتیلہ تشکل ایتمشدر . ایلک
جماعتلر ، تدریجاً بر شخصیت کسب ایتمش ، بسیط بر عضویت اجتماعیہ
وجودہ کتیرمشدر : قلائلر clan رابتدائی طائلر بویله جه — ذوی الحیاندہ کی

مهریدلره معادل برر عضویت بسیطه دیمکدر اولنلرک افرادینک مشترک برنامی، مشترک بقیعه اراضیسی، مشترک برطاقم زوجات و ازواجی و الحاصل: هیئات عمومیه سنک حقیقی بر شخصیتی واردر .

قلانلر دخی، مهریدلرکی، آنجق بر حده قدر بر یویه ییلر؛ افراد مشکله لری آنجق بر حده قدر تزايد و تکثر ابدیه ییلر، محیطک مقتضیاتی ایله — مواهب غذائیسی و ایجابات تحفظیه سی ایله — معین و محدود اولان بوحدی کچنجه بر قسمی آریلغه، آری بر قلان تشکیل ایتمه باشلار آری قووانلرینک اوغول و یرمنه، ذوی الحیاتک تجزی و ترر صورتیله — ذاتاً بوتون صور تناسل و تکثر حقیقت حالمده بر نوع تجزی و ترر دیمکدر — تکثر ایتسنه مشایه و معادل اولان بوحاده، بوتون اقوام ابتدائییه وقوعه کلوب طور میده در . دهامعضل و مکمل اولان جمعیات بشریه ده، غالباً لارک تکثر و افتراقی ده بوکا تشبیه و تقرب اولونه ییلر بعضاً قلانلر منفرد و حتی مخاصم قالبر . بعضاده بونلر آره سینده مناسبات حسنه تأسس ایدر؛ بر اتحاد باش کوستر بر : بعض قلانلرک بوتون ارککاری دیگر بعض قلانلرک بوتون قادینلرینه قوجه، بالمقابله بعض قلانلرک بوتون قادینلری ده دیگر بعض قلانلرک بوتون ارککارینه قاری صاییلر . بو قلانلر آرده صیره ده بر مقصد مشترک ایچون — آو ایچون، حرب ایچون، تدافع ایچون، تجاوز ایچون — برلشهرک مشترکاً و متحداً حرکت ایدرلر . قلانلرک بو صورته تشکیل ایتدیکی هیاتلر، ثابت بر شکل آلجه ایکنجی درجه ده بر تعضو اجتماعی وقوعه کلش، بر عشبورت تشکیل اتمش بولونور . هر عشرتی تشکیل ایدن قلانلرک خصوصی ناملرندن، خصوصی اراضیلرندن، حتی خصوصی رئیس لرندن باشقه مشترک و عمومی ناملری مشترک و عمومی اراضیلری، مشترک و عمومی رئیس لری اولور . بو صورته

تشکیل ایدن عشیرت‌لرک اجتماعی ایله دها معضل هیأت اجتماعیه‌لر، کوچوک حکومتلر... بونلرک اتحادی ایله‌ده برقات دها معضل هیأت اجتماعیه‌لر، بویوک حکومتلر و ملتلر وجوده کلیر.

تاریخ و اتوغرافیا، بو اوست اوسته، بو ایچ ایچه هیاتلرک یلتیز توکمز انواع و آتاتی کوستریور: پوروژلر قلان حالده یاشامقده، قلانلر طاقم طاقم برلشهرک عشیرت‌لر تشکیل ایتمکده‌در؛ بوعشیرت‌لر دخی آوروپالیرک استیلای صیره‌سنده تدافع ایچون طاقم طاقم برلشمن، دها بویوک و معضل هیاتلر وجوده کتیرمش ایدی.

آوسترالیا و آفریقا ائوامنده عینی حال کورلمکده‌در. آوروپا اقوامی بیله بو طریق تکاملی تعقیب ایتش، بو صفحات تکاملی کچیرمش‌در: اسکی رومه واسکی یونانستان بدایتده یوزلرجه مستقل عشیرت‌لردن، جماعتلردن متشکل ایدی؛ ژهرمه‌نلر دخی عینی حالده ایدی، شمدیکی حکومت‌لرک اک بویوک واک متمرکز لرینک — فرانسه و روسیه‌نک — بیله طوبراغنده یوزلرجه کوچوک کوچوک حکومتلر و عشیرت‌لر موجود ایدی. جمعیات بشریه‌یی تشکیل ایتش اولان بو جماعات و عناصر مختلفه آره‌سنده کی ترابطک درجه‌سی‌ده — عضویاتی تشکیل ایدن زوئید و مریدلرک آره‌سنده کی کی — پک متفاوت‌در: هرناحیه‌سی استقلال و شخصیتی محافظه ایتش اولان اسویجره هیأت اجتماعیه‌سی ایله، عشار مشکله‌سنی صنف‌لره آیرمش بونلر آره‌سنه کچلمز حائللر قومش — والحاصل سوسیالیست‌لرک شمدی Socialisme d'état نامی ویرمکده و تطبیقی تمی ایتمکده اولدقلری طرزیه یاقین بر اصول اداره‌یی سکز طبقوز عصر اول تأسیس ایتش — بولنان اسکی پهرو هیأت اجتماعیه‌سی آره‌سنده بونقطه نظر دن نه قدر بویوک برمسافه وار! و بومسافه‌نک نقاط مختلفه‌سنه نه قدر

متنوع هیئات اجتماعیه توزع ایتش .

شوراسی ده شایان دقتدرکه عینی بر جمعیتک هیأت مشکله سی آرہ سنده کی ارتباط واستقلالک درجه سی بیلہ یکنسق اولیور : بر عضویتی — ازجلہ بر معضله یی — تشکیل ایدن حلقه لک زوئیدلرک هبسی عینی درجه التصاق واستقلالده اولمادینی کی هر جمعیت معضله یی تشکیل ایتش اولان هیأت بسیطه دخی عینی درجه التصاق واستقلالده بولمئور ؛ عضویتلرده بعض زوئیدلر ، بعض حلقه لر داخلأ و خارجأ پک متخیز وهان مستقل قالدینی حالده بعضلری پک ملنصق و خارجأ و داخلأ غیر متمیز برحاله کلدیکی کی ، جمعیتلرده بعض هیأت مشکله — بعض جماعات — متمیز وهان مستقل قالدینی حالده بعض جماعات وهیئات تماماً اختلاط ایدرک غیر قابل تمیز برحاله کلیور ؛ عضویتلرده عمومیتله رأس تشکیل ایدن ولواحق واطراف مهمه یی حامل اولان زوئیدلر ، دیگرلرینه نسبتله ، دها زیاده التصاق و اختلاط ایندیکی — استقلال و شخصیتی دها زیاده غائب ایله دیکی — کی ، جمعیتلرده پانختی وباشلی مراکز اداره یی تشکیل ایدن هیئاتلر ، دیگر جماعتلردن دها زیاده التصاقات و اختلاطاته دوچار اولیور ، شخصیت واستقلالنی دها زیاده غائب ایدیور . بوتون حکومتلرده کوی جماعتلرینک اینجه استقلال و بویوک بر شخصیتی وار ؛ چوق حکومتلرده ناحیه لک استقلال و شخصیتی بیلہ باقی ...

بو بولده مقایساته دوام ایدلدکجه عضویتلرله جمعیتلر آرہ سنده دها برچوق مشابهنلر کورولور . عضویتلرده بعض اعضا برر عضویت بسیطه دن — برر زوئیدلر یا مه رییدن — عبارت اولدینی ، بعض اعضاده مختلف عضویات بسیطه نک — متعدد زوئید و مه ریدرک — بعض اقسام متشابه سنک اختلاط والتصاقدن حصوله کلدیکی کی ... جمعیتلرده

بعض اعضا، بعض صنوف، برهینات بسیطه دن — برعشیرت، برجماعت مشكله دن — عبارت، بعض اعضا، بعض صنوف، ده عشر و جماعات مشكله سنك افراد متشابه، سنك التحاقدن متكون بولونیور... جمعیتلرده، عضویتلر آره سنده کی اشتراکات واجتماعات غیر متجانسه به مشابه حادثه لری بیله کورولیور :

عناصر حاکمه ایله عناصر محکومه نك، سکنه اصلیه ایله اهالی مستولیه نك، صنوف ممتازه ایله رمزۀ اسر نك مناسباتی، طفیلیك و همکمیاتیک طرزنده بر حادثه دکیدر ؟

بعض علما عضویتلر ایله جمعیتلر آره سنده دها شدید بر مشاهت اولدیفنی بر وجدان اجتماعی Conscience Sociale بیله بولندیقی ادعا ایدیور . بو، اطرافیه تدقیق و توضیح محتاج بر مسئله در : عجا بوتون عضویتلرده بر وجدان مشترک وارمیدر ؟ بر صولوجانك، بر قورای هیئاتنك وجدانی نه حالده در ؟ فردلر ایله هیئاتلرک حدودی قطعی بر صورتده معین اولمادیقه کوره، وجدان شخصی ایله وجدان اجتماعینک تفریق ناصل قابل اوله بیله جکدر ؟ عجا وجدانده برهینات، برمحصله، بر مجموعه دکیدر ؟ انسانلرده کورولن واحده و منفردلر، جمله عصیده لر اوزرنده یاییلان تجربه لر، بونی اثبات ایتزمی ؟ عجا بر جمعیت بشریه یی تشکیل ایدن افراد مختلفه نك وجدانلرینك بر رابط و آهنکی، بر محصله سی یوقیدر ؟ بر آره به طوپلانمس بر مسئله به توجه فکر و حس ایتش بر کتله خلقده کورولمکده اولان آثار روحیه مخصوصه، بو ترابطك بو محصله نك پك جلی تظاهراتی دیمک دکیدر ؟

بومسائل روحیه و فلسفیه هر نه صورتله حل ایدیلیرسه ایدیلسون هیچ شبهه اوله مازکه عضویتلره جمعیتلر آره سنده بر چوق نقاط نظر در

بویوک مشابیتلر وار. آرملرنده کی فرقلرک اک بویوک : عضویتلرده افراد مشکلهک بربرینه تماسی، و ثابت بر موقع اشغال ایله دیکی حالد جمعیتهلرده حال بونک عکسی اولماسندن عبارتدر. فقط بوفرقت اوقدر اهمیتلی برشی دکلدر؛ فضله اوله رق بونی بدرجه یه قدر تخفیف ایده جک حادثات ده موجوددر : عضویتلرک یونوع مصوراتی ثابت بر موقع اشغال ایتمز؛ مصورات مهاجره و یازشیمه Embryonnaire ou migrateur نامیه معروف اولان کریوات نسجدن نسجه عضودن عضوه کچر، و یک مختلف شکلر آله رق یک مختلف انسجهک تشکیل و ترمینه خدمت ایدر. جمعیتهلرده بوتون افرادک حال و موقعی یک ده اوقدر تبدل ایتمز؛ بعض جمعیتهلرده افرادک حال و موقعی ارنأ تعین و تقرر ایدر. یک محدود بر ساحه ارضدن خارجه چیقیمیان کویلیلر، حتی بر قاق محدود محله سنک خارجنی بیلین شهرلیر نه قدر چوق؛ فضله اوله رق افرادی عادتاً بر طاقم کوزلره توزیع و تقسیم ایدن و هر فردی طوغدینی کوزده - نشأت ایتمدیکی صنفده - قالمغه مجبور و محکوم قیلان هیاتلر بیله نه قدر متنوع؛ خلاصه بوتون بومقایسات کوس-تریپورک : تعضو و اجتماع عینی حادثهک ایکی مهم صفحه سیدر؛ عضویتلر بر جمعیت، جمعیتهلرده بر عضویت دیمکدر عضویتلرده ده جمعیتهلرده ده یک مختلف درجه لر، یک متفاوت ترابطلر واردر. جمعیات بشریه ده کی ترابط و تقسیم اعمالک اک یوکسک درجه سی، بر چوق عضویتلرده کندن چوق ده ایلری، فقط مکمل و معضل عضویتلرده کندن چوق ده ایلری.

عجیبه بودأما بویله می اوله جق؟ ایلریده بر قات ده ایلری، بر قات مترابط جمعیتهلر شکل ایتمه جکمی؟ جمعیتهلرک اک یوکسک درجه سی عضویتلرک اک یوکسک درجه لرینه تقرب ایتمه جکمی در؟ شیمدی به

قدر قلائدك اجتماعيله عشرتلىر ، عشرتلىك اجتماعيله مدنیهلر مدنیهلرك اجتماعيله ملتلىر شكل ايتدىكى بعض ملتلك اجتماعى ايله بر طاقم حكومتلىر دخی وجوده كلدیكى كی ، عجباً شمیدین صوكردهده — ملل و حكومات موجودهك اتحادى ايله — بویوك قونفدهده راسیونلر شكل ایتیه جكمیدر ؟ تكامل اجتماعى ، شمیدین صوكره جمعیات شكل ایدن افراد و جماعاتك ترابطى تشدیدى تخفیفى ایدهك ؟ جمعیات حاضرهك شخصیتلىر تزايدى تناقص مى ایلدهك ؟ قصه بر تعیر ايله اندیویدو آلېزم Individualisme مى یوقسه سوسیالېزم Socialisme مى غایه ایدهك ؟ بوتون جمعیات بشریهده بدایتده موجود اولان مساوات و حریت تدریجاً زائل اولدقن صوكره ینه عودت و تأسسه باشلادینى — مساوات ابتدایانه دورى اوزون بر دور تغلب و تحیردن صوكره بر مساوات مترقبانه دورى تعقیب ایلهدیكى — كی ، عجباً جمعیات حاضره بر کون گلوبده ایلک دورلردهكى آنارشى anarchie و قومونېزم communismه موازى و معادل بر شكله واصل اولیه جكمیدر ؟

بوسؤللالره آرتق طوغریدن طوغریه اجتماعیات و سیاسیات ساحهسنه کیرمش اولیورزه بن بونلرك یالکز قیدی ايله اکتفا ایدرك ایضاح و حللى دهها صلاحیتدار قلمره براقى ، و علوم طبعیه ايله علوم اجتماعیه آره سندهكى روابط و مناسباتك نه قدر شدید اولدیقى کوسترمك مقصیده یازمغه باشلادیغ — بو مقالهیه بوراده نهایت ویرمكى دهها موافق بولیورم .

ارنگوی ، ۱۴ تموز ، ۳۲۵

ساطع